

Verabschiedig u Laudatio füre Ueli Von Ballmoos

Liebe Ueli

Am 25. Jänner 2021 hesch du am Vorschtang vom Ehemaligeverein SHS Erlach gschrybe u dy Ustritt bekanntgäh, wiu du gsundheitlechi Problem hesch übercho. Dyni Ouge hei afa „schtreike“....ir Nechi hesch fasch nümme gseh u i d Wyte isches chly besser gsy. Du hesch sythär viu Ungersuechige im Spitau müesse dürestah. Derzue hesch vorhär no Todesfäuu ir Familie müesse verchrafte u verdoue.

Äs isch für üs vom Vorschtang schad u truurig, dass du geisch u mir löh di nid gärn lahgh! Aber natürlech verstöh mer dys Aliege u dyni Gründ. Du hesch i dym Brief gschrybe, dasses für di e Ehr isch gsy im Vorschtang vom Ehemaligeverein über 20 Jahr derbyzsy u zwürke, du heigsch üsi gueti Zämearbeit u Kameradschaft gnosse u gschetzt. (:→

Üs geits nid andersch, mir hei di aus fröhleche, ufgschteute, humorvoue u hiufsbereite Maa u i de letschte 16 Jahr di aus härzleche Präsi gschetzt u erläbt! Dys härzleche Gsühn, dyni Bsunneheit u z.B. dyni Gschänk mit kerbgschnitzte Arbeite (am Gottfried Schulthess syg ou chly dankt....) wärde üs fähle. (:→

Liebe Ueli, mir aui vom Vorschtang danke dir eigisch für dys Engagement füre Verein u schlussändlech ou für dyni Hautig gägenüber de Ching u de MitarbeiterInne vom Schueuheim Schloss Erlach! Üs aune hets gfaue mit dir zäme „dä Vorstangcharre zzieh“, mit dir zäme üsi „Jahres-Rituau“ zgschtaute, üsi Aläss oder Fescht zorganisiere u mit dir zäme schöni, unvergässlechi Erläbnis zgniesse. MERCI Ueli! (:→

Mir vom Vorschtang übergäbe dir äs Eggmöbu, wo z.B. chönsch aui dyni Erinnerige ufbewahre.....(nume symbolisch gmeint) (:→

Mir wünsche dir u dr Maria e gueti u zfriedni Zyt! Dir für dyni arückende Operatione u für dyni Erholigszyt aus Guete (mir drücke dir üsi Düüme)!

Mit liebe Gedanke u liechtvoue Grüess